

# **Yakobo Leta**

## **Yakobomna Iriki Leta**

### **Isipkita Yitkak**

Onggityam Yakobo Leta irika riga re Yakobote. Si wip da itemb leta re amrika naskajog leta iriki e sisil peba wingirind. I onggit letam iriki win re amrika A.D. poti eit (48) kemag nat. I itemb leta iriki re Yesumna yingganima e, dide ton re Yerusalem sosind yipa mopyam riga na yibnonj. I ton itemb leta yirikonj re gar ke utkunda riga wa pilwa na yepiya re Ju riga twelp (12) gu wingirind kupka gowukoyind otkoki wekenonj.

Yakobo itemb leta yirikonj re gar ke utkunda riga ouyawa mana ridede wip e gar ke utkunda mile omnikam. I ton kwa danda kima odede yindenry da, “Rada mera ita iminjog gar ke utkunda mile yowamu, si men itaikena kae pita wa omnenuyu.” I ton kwa odede mile gatab yimak yit amneniny, opi re soro gatab, i yit b'ugwatena gatab i bu b'iyyena gatab i tugim ingaena gatab, i b'asourena mile gatab i mimkam wimena gatab i dide yir opmita gatab.

---

### **Simesime Yitkak dide Gar ke Utkunda Rigaina B'idgotnena gatab Yitkak**

**1** <sup>1</sup>Simesime! Kon Yakoboten. Kon re God ma wiko riga en dide Yonggyam Yesu Keriso ma wiko riga en. Kon peba iriken ra komkesa Ju riga waina twelp (12) gu wingirind wanim ma yepim re win gar ke utkunda riga wetaweta wekeniyit b'engabenga kantri wingirind. Naska kon wen simesime tamninyin.

<sup>2</sup>Kor gar ke utkunda nany dide yingganwar! Ra b'engabenga wip bebigip wen tatonkenenanj waina wimenand, win b'ogla ukoi jog sam taukenenindam. <sup>3</sup>Mop nokip win wumir im da onggit bebigimna otonkeni nya kaim win waina gar ke utkunda iminjogim tamnenindam, i ingkaim win kwa mimkam wimena danda takatenindam onggit bebig wingirind. <sup>4</sup>Si onggit mimkam wimena dandapim teyenanj de waina b'ogiljog gar ke utkunda mile wa. Nokim da idenat waina gar ke utkunda mile b'ogiljog taukenenanj komkesa nya ke dide komkesa gatab ke, si

waina gar ke utkunda mile makwa opima kut taukanj komkesa waina  
bebīg wimena wingirind. <sup>5</sup>Ajī yet ra man moina multekipim kut taet  
dimdim gar ke utkunda mile omnikam, man b'ogla erkenyit Godind yete  
re komkesa rīga wa kear ke jabajaba agoniny dide kwa maka samany ke  
amneniny. Si ton ket ita motkau. <sup>6</sup>Ajī ra man erkisit, man b'ogla moina  
kupka gar ke utkunda oramisit, ajī goro nonysipsip kima. Mop nokip  
yet ra man nonysipsip kima erkenyit, man ija emb ji wip ringma re ribit  
yukenkeny sipa wuro. <sup>7</sup>Hemb re man rīga, man goro kwa nony taet  
da, "Kon ita mira okasin Yonggyamim pilke." <sup>8</sup>Mop nokip man re nony  
nimognimog kima rīga et, si mor nony ma ita yipaina nyawind yibim  
Godim pilind, ajī komkesa gatab wa e yikeny.

<sup>9</sup>I kwa gar ke utkunda nany o yinggan yet ra man gou wa nyi rīga  
mitibnyit, man b'ogla iminjog gar sam kima na wumir okatenyit da, God  
ke men moramis wingawīngā nya ke ukojog pipmetind. <sup>10</sup>I dide kwa yet  
ra man jogjog gasa kima mitibnyit, man b'ogla iminjog gar sam kima  
wumir okatenyit da ma namb man moina jogjog gasa kae ukoi pipmet  
yokasit, si God men ita gou wa motiny onggit jogjog gasam pilke. Mop  
nokip mada ija e uj taet odede ringma ra tibimna popo sobijog wīnind  
tekeny, ingkek ket wanakana titmokanj gou wa. <sup>11</sup>Ra lomkongga pemb  
kima pumb wa tainy dide onggit pembit tib nangg yarimyarin omnik, si  
ket onggit tibimna popo opima titmokanj gou wa dide onggit popomna  
ikaeneni kwa ket negir taukanj. Si jogjog gasa kima rigat toda kwa  
odede yipaina wip nya e imaikis, ra ujit ominy tina wulkip wiko omnika  
wingirind.

<sup>12</sup>Yete re man yipa rigat bebigimna otonkena wip awarkeninyit, man  
re ukojog b'ogil kima rīga et. Mop nokip rada man opima onggityam  
bebīg gou wa tamneninyit, si man ita ket Godim pilke mira okasit dem  
dadāl ngirpu kesa yirkokarimna b'ogil dīra rīna re God tīrir amneninonj  
rīga wa ogonam yepim re Godind singi yiyenyi. <sup>13</sup>Ra yipa rigat, man  
okasit bebigimna otonkena, man goro opulitīm da Godte otonkena niyeny  
bebīgind oramitam! Mop nokip maike yipa negirit Godind yotonkenonj  
bebīgind oramitam, i dide kwa God tilenggyam maike yipa rigand  
yotonkenonj bebigind oramitam. <sup>14</sup>Ajī rigap towalenggyam bebigimna  
otonkena im akatenanj, mop nokip ton towainajog gim ke negir singi im  
yimta undokenenanj. Si onggit negir singipim ten ugungatenanj dide ten  
ewikanj towanim negir mile omnikam. <sup>15</sup>I ket ra onggit negir singit ngor  
kima tainy ngor kima kongga re dide, si ton b'iga ukenj ra negir mile e. I  
ra onggit negir milet tina onyita ririr tainy rigajog re dide, si ket ti isma  
pita tainy ra uj e.

<sup>16</sup>Kor gar ke utkunda nany dide yingganwar yena re kon singi eyeninyin!  
Win goro kwa waina gim ke rīga tenjikeninam wen rabem omnennam! <sup>17</sup>Si  
komkesa b'ogil wurar gasa dide komkesa otomantijog yiyag wurar gasa

pumb ke gou wa wuweny re wub kumb ngaya otobarkayam Abum pilkaim. I dide God ma ita b'engendeneny odede wip it re ringmim ra gasa waina wingawinga b'etngendenanj ngayam pilke. <sup>18</sup>I God tina singind men pita nomninonj tina iminjog yitkak kena, nokim da idenat men naskajog pipmet takasindam komkesa Tina otobarki gasa wingirind.

### Utkunda dide Omnika

<sup>19</sup>Kor gar ke utkunda nany dide yingganwar yena re kon singi eyeninyin! Win wumir na tekeniyit odede mile omnikam. Si komkesa riga b'ogla wanakana taenanj utkundenam, aji b'ogla muske yit opurenam raeninem. I kwa goro wanakana soro omnikam raeninem. <sup>20</sup>Mop nokip rigaina sorop ma opima negir kesa dimdimjog mile ririr tamnikan Godim wipind. <sup>21</sup>Si onggit paemb win komkesa kilkil mile dide riga negir omnika mile ewaikeninam wa pilke rinsim re rigap amnikenenanj! Aji b'ogla takasindam dide tamnikindam God ma yitkak rina re God itot eyeninonj waina gar wa, mop nokip onggit yitkakip yirkokar im tagonanj waina wingawinga wa.

<sup>22</sup>Aji win God ma b'ogil yirkokar bage yit yimta undoka riga na taindam, aji goro yipyia nena ke utkunda riga taindam, nokip onggit mile ke win walenggyam b'anyгиненindam. <sup>23</sup>Mop nokip ra yipa rigat God ma b'ogil yirkokar bage yit yipyia nena ke tutkundeny, aji ra ton maka onggityam God ma b'ogil yirkokar bage yit yimta tundokiny, ton re odede riga e yete re tinajog wip b'atapneny wip b'atapnenapu glas ke. <sup>24</sup>Mop nokip ra onggit rigat tina wip b'atapneny dide ket iwas, si ton odenja e nony b'etidas ridede na tilenggyam wip yir b'ang glasind. <sup>25</sup>Aji kea gog yit ririrkip awonj, si onggit gog yitte riga etrareniny God ma b'isagika mile ke. Si yet ra itemb gog yit yirik iyeneny dide nony menamena kima ibneneny, ton ma ita gog yit nony b'etidateny nangga e re yipyia ke utkundeny, aji ton b'ogla onggityam gog yit itaikeny. Si God ita tin b'ogil omny dem komkesa tina itaikena wiko wingirind.

<sup>26</sup>I yet ra ton nonyik b'atimdeny da, "Kon Godind b'obogil e ewangaya iyienyin," aji ton maka ra b'obogil tina weyat ingaena iyeny dide ra tina garind b'atinygineny, onggit rigamma ewangaya mile Godim pilwa re mogji kesa e. <sup>27</sup>Si Abu Godim wipind kilkesa dide b'ogil Godind ewangaya mile riga re ija emb ji da ton b'u ake mog kesa b'iga dide mik kongga tadareneniny dide yim takoeniny towaina b'idgotnena wingirind. I ton re kwa ita tilenggyam yir b'itipkeneny, si onggit paemb ton makwa ita kil kima taukeneny onggit gowukoi mile ke.

### Goro Gim ke Riga Okatam

**2** <sup>1</sup>Kor gar ke utkunda nany dide yingganwar! Win gar ke utkunda yoramitonda mera Yonggyam, Yesu Kerisom pilind yete re b'ogil

inyomarenand yibim. Si onggit paemb win goro yipaina gatab nena b'isnawa mile tamnikindam. Ma b'ogil mile e. <sup>2</sup>Odede rada nimog riga b'itgarya waina yir opmitenapu met wa, yipa re gold yimkak ringi b'ikiti dide otomanti ukoi mira kima kobirgim b'ikoki jogjog gasa kima riga e, i dide kwa yipa re gujguj kobirgim b'ikoki gasa kesa riga e. <sup>3</sup>Si ra win itemb otomanti ukoi mira kima kobirgim b'ikoki rigand yir ongya b'ogil isnawa kima dide omnya da, "Simesime, metkim ayo! Omand omite dikind b'ogil omittenapu kasand!" aji kwa daka win ija e gasa kesa rigand omnya da, "Omanda ta onyite-o! O omite gowind!" <sup>4</sup>si win kemb wa wingirind yipaina gatab nena b'isnawa mile yomnikya, dide win kwa kemb negir nony menamena kima b'isagika riga aukindam.

<sup>5</sup>Kor gar ke utkunda nany dide yingganwar yena re kon singi eyeninyin! Win koina yit b'obogil nony menamena kima utkundena! Si iminjog e da God gasa kesa riga abagikinonj onggit gowukoyind, i ket wingawinga ke jogjog gasa kima riga amnikeniny towaina gar ke utkunda wimenand, i dide kwa ten pumb tunggimna owabinta riga amninonj, nokip kea Ton tirir yit amninonj riga yepiya re Tin singi yiyaneno. <sup>6</sup>Aji win walenggyam walenggyam im gasa kesa riga isnawa kesa amnenindam. Si ringma, ma jogjog gasa kima rigapim wen aramitenanj bebigind rinte ra win ma ririr im okatam? Dide kwa ma tonpim wen kotim igonyigony eyenanj negir ma b'isagika okatam? <sup>7</sup>I kwa ringma, ma jogjog gasa kima rigapim yisadrenenyi b'ogil isnawa nyi ringkaim re rigap wen nyi agenairanj? <sup>8</sup>Aji ra win iminjog yimta undokenenya it re God ma ukoi wip iyena gog yit rinte re yina peband iriki yibim da, "Singi yiylene mor rigand mada re dide!" si win b'ogiljog mile e yomnikenena. <sup>9</sup>Aji ra win riga wa pilwa yipaina gatab nena gim ke b'isnawa mile omnika teyenindam, si kemb win negir mile im omnika eyenindam. Nokip gog yitit onggityam mile emjateniny da win gog yit opima arbekenenindam. <sup>10</sup>Mop nokip yet ra tawaminy komkesa gog yit, aji onggit komkesa gog yit wingirind yipaina gog yit nena erbenj, si ton re kemb komkesa gog yit erbeka riga e. <sup>11</sup>Mop nokip Godte yinden da, "Goro gigir dide yigyig b'iyena mile omnikim!" i kwa yinden da, "Goro riga ongandim!" Si man maka ra omnikeet gigir dide yigyig b'iyena mile, aji man riga uj ondriket, kemb man gog yit erbeka riga aet. <sup>12</sup>Si win nony kima apureninam dide yir kima mile omnika eyeninam, mop nokip God wen tesagikiny dem Tina gog yit kaim ringkaim re men b'itrari wekenyin Tina b'isagikam pilke. <sup>13</sup>Mop nokip yet ra maka kear kima riga yim takaeeniny, God daka ita ti pilind kear kesa b'isagika omnik dem. Aji yet ra man riga kear tamnikeneninyit, onggit kearte men pumb wa muturowas dem God ma b'isagika winind, si man b'ogil sam e taet dem.

### Gar ke Utkunda dide B'ogil Mile Omnika

<sup>14</sup>Gar ke utkunda nany dide yingganwar! Yet ra ton indeny da, "Kor ita gar ke utkunda," aji ton maka ra b'ogil mile omnika teyeniny, si nangga

b'ogil e ik ti pilwa, ra ton odede gar ke utkunda nenand ibim? Si onggit gar ke utkundat makwa ririr e onggit rigam yirkokar okau. <sup>15</sup> I dide kwa rada wa wingirind yipa gar ke utkunda riga o kongga, ton kobirgimim kut tau gibil winind dide owoupa ibim owou kesap, <sup>16</sup> si ra wa wingirind yipa rigat tin ominy da, “B'ogil sitawar! Pembim b'ogil kobirgim b'likite dide ngorim b'obogil owou awine! Si kon mitraren,” aji ton maka ra ti okainy owou dide kobirgim, si onggit opurena ke nanggamog b'ogil e itkau onggit bebig kima rigam? <sup>17</sup> I kwa gar ke utkunda mile toda odede yipa wip emb ji da, ra gar ke utkunda mile maka ra b'ogil mile omnika kima ibim, itemb gar ke utkunda mile yibim re uj e.

<sup>18</sup> Ajì ra yipa rigat odede indeny da, “Man re gar ke utkunda mile kima et, aji kon re b'ogil mile omnikayam en.” Si man moina gar ke utkunda mile pitand nouyae b'ogil mile omnika kesa ke! Koda ita koina gar ke utkunda mile mor pitand motouyaen koina b'ogil mile omnika ke. <sup>19</sup> I man kea iminjogim yomnyit da God re yipaina e. Si b'ogla namb! Negir wingawingap toda kwa opima namb yipa wip iminjogim omnena yiényi, si onggit paim ton ukoi mogá kima kaktiti aenanj. <sup>20</sup> Korirkorir riga! Ma man iminjog singi et wumir okatam da, gar ke utkunda mile re ma ita wiko omnik b'ogil mile omnika kesa, dide itemb tina gar ke utkunda mile re mogji kesa e? <sup>21</sup> Si ringma mera b'u Abraamim gatab yit? Re ton tina lesmita b'iga Isakind yiyonj dide yoramitonj yina si omnikapu kap kumb wa Godim singi si gasa okawam, si ringma, ma tina onggit b'ogil mile omnika kena God ti negir kesa dimdimjog riga nyi yokawonj? <sup>22</sup> Si wiñ kea wumir aindam da, tina gar ke utkunda mile re yipa nat gilgil wiko yomnikenonj tina b'ogil mile omnika kima, dide onggit tina b'ogil mile omnikat tina gar ke utkunda mile kupkakupka mogji kima pita wa yomnenonj. <sup>23</sup> Si yina peband ija emb ji iriki yibim da, “Abraam Godind gar ke utkunda ke yokatonj, si ingkenaemb God pita yomnonj da ton re negir kesa dimdimjog riga e.” Si kea itemb God ma yit ririrkip awonj tina onggityam b'ogil mile omnika ke. Si onggit penaemb rigap tin yogenayo da, “Ton re God kima yipand rigariga i.” <sup>24</sup> Si wiñ ke wumir aindam da, God b'ogil mile omnika kaim riga wa agoniny negir kesa dimdimjog riga nyi aji ma gar ke utkunda nena kaim. <sup>25</sup> I odede yipa wip nya kena yiagyiyag iyenapu kongga Raab toda kwa b'ogil mile omnika ke yokatonj negir kesa dimdimjog riga nyi, re ton simesime amnonj Ju riga waina bageyam dide ten etmikitonj wigawiga b'enga nya nata. <sup>26</sup> Si men ket wumir im namb da, wingawinga kesa riga ji re ujgim e, i odede yipa wip kwa b'ogil mile omnika kesa gar ke utkunda re uj e.

### Weyat ke Negir Mile Omnika

**3** <sup>1</sup>Kor gar ke utkunda nany dide yingganwar! Win goro wa wingirind jogjog riga singi taukinam God ma yit ouyaena riga awowim, nokip

win kea wumir im da sin ouyaena rigap ita bebigjog b'isagika okasu dem. <sup>2</sup>Mop nokip komesa men jogjog b'engabenga wip negir nyawind sap otendenindam wimena wingirind. I ra yipa riga maka sap totenj tina opurena ke, itemb riga re killkesa dimdim riga e. Si ton ririr e wip iyeny tina komesa ji b'ogil mile omnikam. <sup>3</sup>Si kon ninda wingata yit nitindeniyin. Ra man oso ogokam sobijog ayinkak b'iga oramisit osomna tu bora wa, si oso ita men yimta mutundok. I kwa man ririr e tina ji komesa ingaenyit ritata ra man singi menonim. <sup>4</sup>I kwa win nony wuwene ukojog giga wa! Ra rigat yipa ukojog giga iyeny sipand dide ra ukoi danda kima rib dide wuro ikeny giga wa, si nangga ma ji rada itemb giga ukojog e, giga kibiyamit ita giga wip iyeny sobijogjog karab ke. Si kibiyamit itemb giga dimdim e yii ritata ra ton singi giga iyoyim. <sup>5</sup>Odede yipa wip nya ke kwa rigaina jiwind weyat re sobijog kipear e, aji ton ukoi gasam ita b'atisoureny rigaina wimena wingirind.

I kwa nony wuwene de ringma ra sobijog wulpotit embomb iyeny komesa ukojog b'uwa! <sup>6</sup>I weyat re yipa wip e it re wulpot re dide. I kwa tina komesa negir mile omnika re yipa b'enga gowukoi pila e. Weyat tina pipmet yokas rigam jiwind re ija e it re ninda kipear re dide, i kupka rigamna ji negir wip yomnikeneny. I dide onggit rigamna komesa yirkokar wimena imbrika yiyaneny, i itemb wul re wul tungg ke so omni e yibim. <sup>7</sup>Men rigap ririr im tangenindam dide tauyaenindam odede opi re komesa b'engabenga wip b'angga, i ngena, i mukak ke gowind menamena b'angga, i dide sipand kabum. Si opimemb komesa b'angga rigaina wira nasim wekeneny. <sup>8</sup>Aji rigat ma ririr e weyatind ingaeny, nokip weyat re ngirpu kesa negir gasa e dide ujimna guda ke yindangir e yibim. <sup>9</sup>I onggit weyat kae men Yonggyam Abund yewangaenenu. I dide onggit yipaina weyat kae sake yit apurenendam God pila omniki riga wa pilwa. <sup>10</sup>Si yipaina tugim ke opekenenanj re ewangaya yit im dide sake yit im. Kor gar ke utkunda nany dide yingganwar! Si itemb re ma b'ogil mile emb ji. <sup>11</sup>Si ringma, osiya metmet nyi dide burakak nyi topekyia yipaina nyi opekapu ke rinte ra ibim yipaina nyi kip borand? <sup>12</sup>Kor gar ke utkunda nany dide yingganwar! Ringma, pig wulit ririr e kip tejagikiny olib kip? O greip kayit ririr e kip tejagikiny pig kip? Si ija emb ji yipa wip sol nyi opekapu, toda ma ririr e metmet nyiwim b'engendam.

### Godimna Okai Iminjog Multekip

<sup>13</sup>I wa wingirind yete ririr e tapureniny da, “Kon b'ogil multekip kima en, si kon wumir en ridede e dimdim wimenam Godim wipind. Dide kon gasa omnika wumirjog en, si kon wumir en ridede e gasa omnikam?” Si ton b'ogla opimemb tina b'ogil omnika mile tengaeneniny nony kima muske wimena mile ke dide b'ogil multekip ke rina ra ton wumir okateny

ridede e dimdim wimenam Godim wipind. I ingkaemb ket ton b'ogla pita wa taminy tina b'ogil multekip dide tina gasa omnika wumir.<sup>14</sup> Ají yet ra man negir burakak mile omnika kima nonyik b'iponena okasit moina gar wa, dide kwa ra b'enga riga ma ukoi pipmet isatam ukojog singi taet, goro man b'atisourenim da, "Kon b'ogil multekip kima en, dide gasa omnika wumirjog en." Si ingkae namb man b'anygineniyit, i itemb moina b'asourena yit ma ita ririr ainy Godimna iminjog omni yit kima.<sup>15</sup> Itemb b'asourena multekip re ma pumb tungg kae ik. Ají itemb re onggit gowukoyimna e, i itemb re rigaina gim ke singi mile kae, i dide kwa itemb re negir wingawinga ma otobarki e.<sup>16</sup> Si kon b'ogil e odede nitinjin, mop nokip rikind ra wa wingirind nonyik b'iponena mile dide b'enga riga ma ukoi pipmet isatam ukojog singi tekeny, si toda kwa indaima wip ongwati kesa mile dide b'engabenga wip negirjog mile tekeny dikind.<sup>17</sup> Ají ra yipa rigat okas dimdim wimenam b'ogil multekip rinte re pumb tungg ke ik, si naskajog ton Godim wipind kilkesa e ibim, i kwa riga wa wingirind ngimbla kima e ibim, i musik isnawa nony kima e ibim, i iminjog dimdim nony ipangendi na ibim, i dide ita winind kear mile dide b'ogil milemna kip yindangir na ibim. Ají ton ma ita yipa gatab nena b'isnawa mile dide ti ma ita gim ke b'ogil aji ngor wa negir mile.<sup>18</sup> Si yet ra ngimbla kima wimena ikeny riga wa wingirind, ton ngimbla omnika riga e tainy, i ingkaemb negir kesa dimdimjog milemna kip tijagikanj.

### Gowukoi Gim ke Singi gatab Yit

**4** <sup>1</sup>Si wa wingirind ringkaim geja b'iyena mile dide b'ipowa mile aukanj?  
 Si ringma, ma waina gowukoi sam okatam singi wa pilkaim pita auka wuweny rinsim re geja b'iyenanj waina kipear ingaenam? <sup>2</sup>I win gim ke gasa im singi eyenindam, aji wa ma opima onggityam gasa. I win onganda mile dide nonyik b'iponena mile im amnikenenindam, aji makwa ririr im win waina singi gasa temjindam. I dide win kwa wa wingirind b'ipowa mile omnika eyenindam dide geja im b'iyenindam, aji wa ma opima onggityam gasa, mop nokip win makwa ita yigekeny Godind nanggamog im re win singi eyenindam.<sup>3</sup> Win yigekeny, aji ma opima akatenindam, mop nokip win odede negir nony menamena kima e yigekeny da, idenat win opimemb okati gasa wainajog singi omnikam tengaenindam.<sup>4</sup> I win, gigir dide yigyg b'iyena mile kongga pila riga! Si ringma, ma win wumir im da yet ra gowukoi kima rigariga tainy, ton kemb God kima geja riga e ainy? Si onggit paemb yet ra man singi taet gowukoi kima rigariga awowim, man kemb molenggyam God kima geja riga e aet.<sup>5</sup> O ringma, win ija im nony aindam da God ma yina pebat ril kesa e yindenya da, "God ukoi singi kima e meraina wingawinga yir ungauneniny nonyik b'iponena kima rina re Ton wimenam aramkinonj mera pilind"?<sup>6</sup> Aji God iminjog im nogoniny ukojog wurar. Si onggit paemb yina pebat yindenya odede da,

“God geja riga e aeny b'asourena riga wa pilwa,  
 aji Ton wurar im agoniny towa pilwa yepim re towalenggyam  
 sobijogim aenanj”

<sup>7</sup>Si win b'ogla iminjog walenggyam b'atkaindam Godind yimta undokam, aji geja omnikam tonyisindam Satanam pilwa! Si idenatemb ton b'itkeny wa pilke. <sup>8</sup>I win b'ogla wus wa ainam Godim pilwa! Si idenatemb toda wa wus wa tainy. Negir mileyam! Win b'ogla tesekindam waina negir mile kima yim. Nony nimognimog riga yepim re win singi aramitenindam Godim pilwa dide onggit gowukoi gasa wa pilwa, win kilkesa nony menamena na omnika iyiena Godind ewangayam! <sup>9</sup>Si win b'ogla gar kopa okatena kima dide gar bebig kima yii ainanam, i dide b'okta obairena kima yii ainanam! Win waina ngong engenjinam de gar bebig kima yii wa, dide kwa win engenjinam waina sam de gar kopa okatenam! <sup>10</sup>Si win b'ogla mera Yonggyamim wipind walenggyam sobijogim tainindam. Si idenatemb ton wen turowasiny.

<sup>11</sup>Gar ke utkunda nany dide yingganwar! Win goro negir yit opurena ke walenggyam walenggyam gou wa taininam! Yet ra negir opurena ke wa wingirind yipa riga gou wa omny, o ra tin negir b'isagika yit ke omny, ton kemb negir opurena ke gog yit gou wa yomny, o ton kemb gog yit negir b'isagika yit ke yomny. Aji ra man gog yit negir b'isagika yit ke omnyit, man ma onggityam gog yit yimta undoka riga et, aji kemb man gog yit b'isagika riga e aet. <sup>12</sup>Si gog yit ogona Riga dide b'isagika Riga re yipaina e. I Ton ririr e riga wa dadal ngirpu kesa yirkokar tagoniny o negir tamnikiny. Si yetet man ji riga yet ra man b'isagika iyenyit yipa rigam pilind? Si mor ma ita danda riga b'isagikam.

<sup>13</sup>I win otade b'obogil utkunda! Yepyia ra win isamky da, “Yu o mep men amim wuyin de onggit taun wa o detata onggit taun wa. I wulkip wiko tamnikindam yipa kemag kima, i ingkek ket ukoi jog wulkip takatenindam.”

<sup>14</sup>Aji win ma wumir im waina yirkokar mepnim riode da im wip tesparkiny, mop nokip win re tema pila im odede it re ringma ra sobijog win nenand ibim i dide ket b'etidamkis. <sup>15</sup>Si win b'ogla odede tendonindam da, “Ra Yonggyam meranim singi tainy, si men Tina singi ririrind yirkokar wimena tuwenyin dide Tina singi wiko im omnika teyenindam ite ta onggityam gasa o ite ta onggityam gasa.” <sup>16</sup>Aji yu waina wimenand win ija imemb ji b'asourenindam da, “Men ririr im meralenggyam meraina singi gasa tamnikindam.” Si odede komkesa b'asourena re negir mile im. <sup>17</sup>Si onggit paemb da ra man wumir okasit nanggamog e re b'ogiljog mornim omnikam Godim wipind, aji kwa ra man maka onggityam gasa omniket, si man kemb negir mile e yomniket.

### Jogjog Gasa kima Rigaina Negir gatab B'isagika

**5** <sup>1</sup>Si jogjog gasa kima riga, win otade b'obogil utkunda! Win ukoi yii kima obaireninam dide kwa yii ainanam, nokip wanim ukoi jog bebig kima b'idgotnena re opima tuweny. <sup>2</sup>I waina jogjog gasa kea

itkika im wuweny dide rapsim owou eyenanj waina kobirgim. <sup>3</sup>I waina gold dide silba orliyaliya im aukenenanj, dide onggit orliyapim wanim yir ungarayam gasa taukanj dem da, win maka waina gasa b'obogil engaenentondam Godim singind. Si onggit yir ungarayam gasapim owou teyenanj waina ji odede wip ringmim re wulit gasa embrikeneniny. Nokip win buruburu im amnikindam jogjog gasa onggit kikitum winind. <sup>4</sup>I win waina owou otogam sopapu wiko riga im engaenenindam, aji win ma opima towa wiko mira agonenindam. Si onggit waina mira omni kesa wulkipsim b'okta arara aenanj Godim pilwa, i onggit otoga riga ma b'okta ara kemb b'igarenanj Komkesa Dandam Rigib Riga Yonggyam God Tina yipywa wa. <sup>5</sup>I win otomanti jogjog gasa kima im yirkokar wimena wuwenyit onggit gowukoyind, dide win sam nena singi nasim waina komkesa gasa ririr amnikenindam. Si win odede waina wimena kaim walenggyam b'angenkindam, dide b'angonjenindam Godimna b'isagika bibirim odede it re ringmim re rigap b'angga yir epkenenanj dide b'angonjenenanj onggit onganda bibirim. <sup>6</sup>I win negir kesa dimdimjog riga negir ma b'isagikand aramitenindam dide uj andrikindam. Aji ton maka wen negir ke mira amnento.

### B'idgotnena dide Musik Wimena

<sup>7</sup>Gar ke utkunda nany dide yingganwar! God ma b'isagika ita iminjog ik dem. Si onggit paemb win b'ogla musik wimena tuwenyit, ngirpu Yonggyam ra titenj dem. I win nony aukinam wala rigam gatab! Si ton b'ogil mogji im yir ungauka eyeniny tina sopapu ke, si onggit paemb ton musik wimena ikeny kemag piro dide ile ake wisar piro winind ngirpu ra mogji taukanj. <sup>8</sup>Si wida ija na kwa muske wimena tuwenyit wala riga pila, dide waina gar seo kima anyisinam, mop nokip Yonggyamimna itenda bibir ke momta e. <sup>9</sup>Gar ke utkunda nany dide yingganwar! Ra win bebig takatenindam, goro win walenggyam walenggyam b'injawa tuwenim! Si ra win maka walenggyam walenggyam b'injawa tuwenyit, God toda makwa opima wen onggit mile gatab negir ma b'isagika ke tamniny dem. I win yir de, b'isagika riga re kea mora dunda nate onyiti yibim. <sup>10</sup>Kor nany dide yingganwar! Win nony wuwene onggit gatab da God ma bageyamip kea negir b'idgotnena akatenento, dide mimkam wimena wuwenenonj Yonggyamim nyi kima God ma yit opurenand. Si win b'ogla opimemb towaina wingata yimta undonenenam! <sup>11</sup>I win kwa nony wuwene! Ra yipa rigat musik wimena ikeny tina bebig wingirind, men b'ogla tin ogenayu da b'ogil ke yindangir ai riga e. Si win kea yina peband utkundenya ridele na Yob musik wimena yikenenonj tina bebig wingirind, i dide win kea wumir aindam ridele na Yonggyam ti yogoninonj tina kikitum winind. Si win ingkaimemb wumir yokatenya da Yonggyam re ogenka kesa kear dide ogenka kesa ukoi jog wurar riga e.

<sup>12</sup> Kor gar ke utkunda nany dide yingganwar! Si kikitum yipa ukoi yitpiam e nitinjin. Goro win danda kima tirir yit tapureninam riga wa wipind dide goro pumb tungg ma nyi kima, i goro gowukoi nyi kima, i dide goro nanggamog gasa nyi kima! Ajî win b'ogla tendonindam da "owi," rada win gar kaim iminjog emjatenindam da "owi". Dide kwa win b'ogla tendonindam da "nayi," rada win gar kaim iminjog emjatenindam da "nayi". Nokim da idenat win maka sap totekindam Godimna negir ma b'isagika wa.

### Gar ke Utkunda kima Yir Opmita

<sup>13</sup> I yet ra wa wingirind negir b'idgotnena okateny, ton b'ogla yir ropmiten. I yet ra sam tainy, ton b'ogla Godind esourena ger ratangin.

<sup>14</sup> I yet ra wa wingirind kopa okas, ton b'ogla sosi elda riga rengaukin, i eldap b'ogla Yonggyamim nyi kima gaya yesnike dide b'ogla kwa yir ropmisinem tinim. <sup>15</sup> Si ra ton yir topmitanj gar ke utkunda kima, onggit yir opmitat kopa rigand ita b'ogil ominy, i dide Yonggyam ita tin utnyis. Dide rada ton ke negir mile amnikinonj, Yonggyam opima onggityam negir mile awir omnikainy. <sup>16</sup> Si onggit paemb win b'ogla walenggyam walenggyam waina negir mile pita tamnenindam, dide walenggyam walenggyam yir topmitenindam, si win idenatemb kopa ke b'ogil taukindam. Si negir kesa dimdimjog rigaina yir opmita re ukojog danda kima im, si opima danda kima isma pita taukanj. <sup>17</sup> Eliya re yipa wip riga e, opi re men re dide. I ton danda kima yir opmitenonj piro kesa win awowim, si piro maka yikenonj onggit gowind nowa kemag dide siks (6) mobi wingirind. <sup>18</sup> I kwa ton b'usaya yir opmitenonj, si piro igmarkonj wub kumb ke, dide onggit kak ke ket nanggip b'usaya kip ejagikto gowind.

<sup>19</sup> Kor gar ke utkunda nany dide yingganwar! Si ra wa wingirind yipa rigat Godimna iminjog bage yit kak iau dide negir b'anyginena nya wa wip tau, i ra yipa rigat daka tin itenj Godim pilwa, <sup>20</sup> si ton b'ogla wumir yebim da yet ra negir mile rigand itenj Godim pilwa tina b'anyginena b'auyaena negir nya ke, ton ita onggit negir rigamna wingawingam yirkokar okau uj ke, dide jogjog negir mile utwangkainy.